

Cinco reptos do soberanismo galego para 2020

GALIZA LIVRE :: 10/01/2020

Desde el soberanismo galego de izquierdas revolucionarias se señalan 5 grandes retos para este 2020

1- Unidade antirrepressiva. O independentismo vai enfrentar este ano o juízo da “Jaro”. Doze militantes com umha petiçom de 102 anos de prisom por causas políticas camufladas trás a fórmula de “enaltecimento do terrorismo”. Num país em que a luta armada leva anos ausente, nom se trata mais que da criminalizaçom definitiva do soberanismo. A ilegalizaçom de Causa Galiza e Ceivar icluídas na operaçom judicial suporia o passo definitivo. Paralelamente, outros quatro militantes independentistas da operaçom “Lusista” sofrem dispersom em Soto del Real e Estremera enquanto aguardam o juízo em prisom preventiva. Ainda formalmente inocentes, fôrom deliberadamente afastados das suas famílias polo Estado espanhol incumprindo a legislaçom internacional. Do mesmo jeito, os 19 de Meirás enfrentam-se a penas de até 13 anos de cadeia numha causa que também poderia transcorrer este ano. A proximidade das eleiçons autonómicas pode acelerar todos os processos coa intencionalidade de criminalizar o soberanismo galego axotando a desinformaçom e o espantallo do terrorismo. Por isso cumpre umha resposta unitária que trace a linha vermelha frente às estratégias político-judiciais do Regime do 78.

2- Um espaço habitável e renovado para o independentismo. Mália a repressom, o Processo Trevinca continua reagrupando no debate o soberanismo de fora do BNG. Simultaneamente, o MGS começou o ano com umha xeira de atos semelhantes desde dentro da frente nacionalista. A Mocidade pola Independência persiste na sua atividade que unifica na prática militante as diferentes tendências da juventude independentista. A necessidade dum espaço político que acumule o capital social soberanista para além do Bloco vira-se cada vez mais preciso e também mais possível. A nível estratégico, a possibilidade de que o BNG se subsuma num tripartido que estabilice o regime também desde a Xunta força à sua urgência.

3- Reorganizaçom sindical. Na CIG, o sindicato soberanista maioritário, a ruptura geracional coa mocidade manifesta-se cada vez mais rotunda. Um modelo sindical anacrónico que agrupa em federaçons sectoriais com base no operário fordista, baseado nas eleiçons sindicais e na negociaçom coletiva exclui a juventude maioritariamente desempregada e precarizada. Velhas ideias como a assembleia de paradas e precárias com rango interno de federaçom fam-se vitais, nom só para a pervivência do sindicato, também para nom estragar a potencialidade transformadora de toda umha geraçom. Ignorar o problema mais que um erro seria um crime.

4- Botarmos o Feijoo. O bipartido no governo espanhol, golpes em Ourense como as mobilizaçons de Verim, canda o próprio desgaste do executivo autonómico, podem agudizar a já manifesta baixada eleitoral do PP. Porém, tam apremante resulta a expulsom do governinho da direita espanholista mais corrupta e radicalizada como equivocada a entrada do nacionalismo no governo alternativo. Favorecer essa mudança sem deixar-se absorver,

consolidando um discurso nacional e anti-regime, abofé que seria o mais ajeitado para o BNG e para o soberanismo. Contodo, a improbabilidade dessa opção, dada a composição etária e de classe da frente, canda à sua trajetória, força a umha maior necessidade reorganizativa do independentismo. A estabilização do regime nesta iminente segunda Transición vem da mão do PSOE-Unidos Podemos, a ruptura, do soberanismo. Nessa tesitura, a radicalização fascista do discurso da direita obedece ao contrapeso do próprio regime para a sua perpetuação. O equivalente ao ruído de sabres na primeira Transición ou ao golpe de Tejero. Que o moribundo regionalismo beirista reproduza o medo ao facha para fortalecer o PSOE até criticando a CUP não faz mais que retratar a sua desesperação por “apanhar cacho” nas autonómicas, nada mais. Anular o seu papel folclórico na “galleguización” da esquerda espanholista pró-regime mediante a clarificação política e a retirada de supostas legitimidades constitui também umha obrigação histórica.

5- Acordos estratégicos nacionais e plurais. Para além da política institucional, cumpre sermos quem, como projetos de país, de construir áreas de diálogo e colaboração essenciais. Os meios de comunicação próprios, o ensino, a luta feminista, os centros sociais e a luta ecologista fornecem eidos prontos para esta imprescindível aliança aberta de transformação popular. Neste sentido, superarmos qualquer vanguardismo manipulador e a cultura política cainita que o alimenta supõem, porém, o nosso maior desafio.

<https://galiza.lahaine.org/cinco-reptos-do-soberanismo-galego>